

玄覽堂叢書

第一〇〇冊



081
S8758



上海圖書館藏

經世急切時務

九十九籌卷之七

延陵顏季亨會通著

姑蘇門人

王祚光
李安世

全校

經理財用

今天下需財至急。起而爲財計者。皆能上書言所便。苟可
以足國用者。無論常賦也。水陸之所征。關市之所權。杼軸
之所可材。筐篚之所可挈。在在收之。屑屑取之。地力竭。民
命殆矣。未也。利愈細。而謀愈工。謀愈工。而歛愈急。本無例
也。妄有所託于例之裏。既有額也。又競有所征于額之餘。
必如是。而財足乎天下。未嘗無財也。即爲是。又未見遂有

財也。試稽之外而外訕如故稽之內而內訕如故稽數供
之遼餉而餉訕如故稽各備之邊儲而儲訕如故稽勦寇
之饋運而饋訕如故然則是無救于訕也。無救于訕而呶
呶于理財何益生以爲今之財用不虞其入之而不盡獨
虞其盡之而不可繼也不虞其出之而不節獨虞其節之
而陰有耗也。本以民之故設官反以官冗而剝民之膚也。
本以虜之故賦民反爲虜啗而啄民之髓也。奈之何生嘗

伏讀

明旨加派加餉寔淵然寓不得已之意且與天下期休息
之日然天下未敢謂信然者何也。當有事而加賦必無事

而後緩征當賦一不足而遽擾于民必賦萬分足而後息于民若是者似非終歲之計也請爲之悉其弊治其標而徐陳其利可乎天下賦額歲入一千四百六十一萬有奇而錢鈔不與焉約入內府者歲六百餘萬約入太倉者歲四百餘萬金花銀原解貯陪京以廩武臣備邊警正統始改解內庫而御用則取其餘耳迨

世廟額定歲進一百一萬兩萬曆六年加增二十萬兩歲以爲常而此二十萬兩從何處得來不過奪別項正額補之五尺窰豎司出入之柄雖大臣不得而知其盈縮倘得請宮中府中一體清理免此加增以紓邊計可乎大官所

進六宮所需日以千金。

皇上誠爲民故。深自貶損。爲天下先。第減半膳。可得五百金矣。而又詔令諸司熟計。誰爲冗食。當去何役。當緩令戶工光祿緩急相權可乎。以至宗藩之宜裁限也。塩屯之宜早復也。馬政之宜覈而錢法之宜嚴也。已于別條詳之矣。近有議清皇庄輸贍罰稽油麻艸場田地毀淫祠皆當今急務。而倡優下賤。揉羅綺曳紈縠。而習俗競侈。已成痼疾。謂宜變梨園爲桑田。剝脂粉爲縞素。一驅之力田。一沒爲官婢可也。而今日之遊民尤甚。或競巧好閑。或刁唆構訟。或阻僧作奸。或烏曹梟博甚。而呼羣鼠竊種種不一。

良有司何不驅之歸農也。而今日之遊僧尤甚。或幻論誣
民。或妖言惑衆。或蟻聚坐食。或蜂起作慝。甚而倡狂成盜。
白蓮之亂。其戎首可鑒也。郡牧長何不驅之力。食也不然。
者。司農旣以邊患苦生民。而邊吏不盡以金錢養死士。則
民貧而軍弱矣。貧則恐有不安于貧者。弱則恐有不安于
弱者。天下事發難于有形。而釀禍于無形。殆未可知也。理
財一務。非得忠計臣悉心圖之。奚裨哉。乃根本之說。摠在
人主躬行仁儉。仁以愛民。少爲出而遂。可少爲入。儉以補
費。不能少于不得已之人。而猶能少于所得已之出。庶邊
事有濟。民生有賴。起管范諸人而問之。諒不易吾言矣。不

則未見天下之大而可以析薪數米治也。

壽足兵餉

國家養兵不啻推食飼之。含哺煦之。而且時其寒燠。撫其勞勩。偵其欲惡。靡不周悉。宜其無事。則投石超距。踴躍以願。當一隊有警。則荷戈挾矢。憤激以自效。一死即或饋餉。不繼樵蘇。不給亦宜。奮身鼓壯。敵王所愾。不令敵見有空腸露肘之形。可也。而奈何不然也。固知平日之養。養其肢體而未養其骨幹。養其嗜好而未養其精神。一旦驅之鋒鏑。輒覺軒鶴成行。嗜好違而肢體脆。羴羊墳首。精神萎而骨幹靡。有不藉寇齎盜者。幾希是兵餉兩足。今日建威禦夷之急務也。維我

聖祖酌古準今。以軍隸衛而民無遣戍之勞。以屯田養軍。以鹽筴給屯而民無裹糧之費。嘗曰。養兵百萬。不廢民間一粒米。良有以也。何至今日。卒伍漸凋。勾補不清。奸宄竇而入焉。而餉以詭籍耗。幕置親兵。將畜家丁。若將籍爲勝兵已。而虛有其名。費復幾倍。而餉又以增置耗。一旦寇逼門庭。兵民交困。不得已而調募。未能當額。兵什一不得已。而加餉。未能當屯。餉什一。且所募者。未列于行。而安家之費已不貲。兼以往來數千里。侵掠殘害。滋多。或逃則權以老弱補伍。而驕亢相挾。坐糜我食。而餉以糜費耗其所加之餉。復以輸將之利害不明。費廣于舟車之徭。黜之分數。

不悉。公困于出納之弊。侵剋稅糧。飾厨傳以歡過客。苛求權利。充庭寔以媚達官。而餉又以竇漏耗。自非覈寔而籍之。則餉何以清。簡練而用之。則餉何以省。兵簡則老弱可汰。何至以餉爲養濟也。兵練則材官可使。何至以餉爲貪漁也。我于忠肅之理三營也。選精銳立十營。歸其不堪者于伍。將皆知卒。卒知兵。而不敢以市人混。故無羸兵。自無詭兵。無虛餉。自無詭餉。推而廣之。邊兵之當嚴飭也。土著之當團練也。遊民驅之歸農也。僧尼禁其耗食也。馬政課其羸壯。覈其價值也。劉巴鑄錢之議。劉晏關中之運。當講也。兵餉權宜之術。不可殫述。而根本之慮。永以益屯爲最。

今鹽利金存而粟亡。屯政名存而寔亡。生已別詳之。鹽屯諸論。茲不復贅。若以敗殘之充伍。爲兵科派之鏹銖。爲餉非吾所謂兵餉也。

脩舉屯田

今蒿目而憂邊計者。靡不津津談屯政矣。夫屯之額數自在也。屯之規制自若也。昔何以有餘。今何以不足。昔何以崇朝決之。而創置易。今何以頻年議之。而克復難要之法。固弊矣。未可盡諉法也。人廢法矣。未可純責人也。則以議之者多。而任之者少也。任之者易。而終之者難也。蓋自阡陌開。而井田廢。周制已不可考。屯也者。倣古兵農合一之規。而存其意于如綫者也。漢晁錯請募民實塞下。家室田作爲備邊計。趙充國擊先零。罷騎屯田以困敵。其後魏操屯于許昌。武侯屯于渭南。晉懿屯于汝潁。元振屯于涼州。

子儀屯于河中。李泌焚流民于關中。李絳請開營于振武。何承矩議墾田于河北。靡不收屯戍之利。而邊儲國用咸有賴焉。我

太祖憫海運之艱。分屯布列邊腹。基置而成。祖市牛鑄器。令將勞問屯士所苦。且耕且守。海宇晏然。顧承平日久。奸宄百出。膏腴占爲莊田。空地總于邊帥。則無田可耕。夷虜出沒。不常憊卒。耕耘無據。則田不能耕。職官屯者優游。城市而不歷溝塍。司典屯者憑信簿書。而不按廩實。則田不必耕。視爬沙而指已戾。見偃僂而腰難拆。則士卒又不樂耕。微逋急而叛。漢入胡。拋荒多而難成。易敗則官府又

不知耕有如先臣商輅梁材劉定之王燁所論奏者勢不
得不運東南之粟而養西北之兵竭東南力作之膏脂而
飽西北坐食之谿壑也今日之天下何如哉夷氛告警于
東叛賊倡亂于西將士之腹長枵度支之肘常掣及此而
始議屯迂也及此而猶不復屯誤也第議者毋徒競卮談
任者毋徒循故事破拘攣之見假便宜之權批雖黃之口
予以重責成之任乾沒之所當覈也侵包之所當稽也養
廉之當均派也經界之當畫一也墾田之當緩征也牛種
當給而亭障當修也緣河防海而齊地之宜首行也興西
北之水利以殺圯決而謹各邊之溝壘以限戎馬也一一

聽主者之揮霍而勿課之以速效如永樂之獎何福何寧
夏之穀不積如宣德之嘉鄭亨何大同之籽粒不多如天
順之任葉盛何牛種不可復而城堡不可築將曠土皆沃
野而邊鄙悉苞桑矣抑鹽屯相爲表裏所恨葉淇倡議鹽
改拆納商不赴邊遂以一言媒兩敗茲欲修屯政當稽鹽
法仍令邊商輸粟塞下募衆墾上使耕有所資積有所散
則鹽屯相爲委輸而兵農自成合一商以邊爲陸海虜以
田爲地網此兩利俱存之術也卽今天津至山海關一帶
俱可屯田蒙
聖旨批允刻日舉行以安堵流民誠一時救急之良法百

世不易之令典。生但願當事者毋徒恃空言。且更滋聚訟。
致有初鮮終以不負。
聖天子言聽計從之盛德。幸甚。